

I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

ENPLEGU, MERKATARITZA ETA TURISMO SUSTAPENAREN ETA FORU ADMINISTRAZIOAREN SAILA

Diputatu nagusiaren 88/2019 Erabakia, otsailaren 25ekoa, prestakuntza ekipamenduetan inbertitzeko laguntzetarako 2019ko deialdia onesten duena

Une honetako agertoki sozio-ekonomikoan, langileen prestakuntza ezinbestekoa da profesional kualifikatuak eta aurrerapen teknologikoetara egokitzea eta espezializazio maila gero eta altuagoa eskatzen duen lan merkatura sartzeko gaitasuna izango duten profesionalak izaterako orduan.

Prestakuntza helburu horrekin bat datorrela bermatzeko, beharrezkoa da etengabeko prestakuntzan lan egiten duten entitateek eguneratutako eta irakaskuntza eredu berrietara egokitutako prestakuntza ekipamenduak izatea, baita ezagutza eta teknologiaren etengabeko aurrerapenera moldatutako ekipamenduak izatea ere.

Arabako lanbide heziketako zentroek funtsezko erreferentea osatzen dute gure ekonomia eta gure enpresak garatzeko eta enplegua eta, azken finean, gure gizartearen ongizatea hobetzeko. Zentro horiek esperientzia luzea daukate sortzen diren aldaketei aurre egiten eta eskaintzen duten lan arloko prestakuntza enpresen zein pertsonen beharrietara egokitzen.

Horiek horrela, aipatutako helburuak lortze aldera, prestakuntza ekipamenduetan inbertitzeko 2019ko laguntza programarako deia egiten da. Deialdi hori Arabako Lanbide Heziketako ikastetxeentzat eta Arabako prestakuntza erakundeentzat da, Foru Aldundi honek diruz lagundutako beste prestakuntza ekintza batzuk gauzatu badituzte.

Arabako Foru Aldundiak, Diputatuen Kontseiluaren martxoaren 15eko 26/2016 Foru Dekretuaren bidez, Arabako Foru Aldundiaren Enplegu, Merkataritza eta Turismo sustapenaren eta Foru Administrazioaren Sailaren Enplegu, Merkataritza eta Turismo Sustapenaren Zuzendaritzaren eskumenen eremuan ematen diren dirulaguntzen oinarri arautzaileak onartu zituen; araudi horrek arautzen ditu Enplegu, Merkataritza eta Turismo Zuzendaritzak lehia araubidearen pean ematen dituen dirulaguntzak.

Oinarri horien onarpenaren ondorioz, eta ahalik eta zabalkunderik gehien ematearren eta publizitatearen, lehiaren, objektibotasunaren, berdintasunaren eta diskriminaziorik ezaren printzipioak betetzeko, 2019ko ekitaldian ekipamenduetan inbertitzeko laguntzen deialdia ezarri behar da.

Horregatik guztiagatik, Enplegu, Merkataritza eta Turismo Sustapenaren eta Foru Administrazioaren Saileko foru diputatuak proposatuta, eta dagozkidan ahalmenak erabiliz,

XEDATZEN DUT

1. Prestakuntza ekipamenduetan inbertitzeko laguntzen 2019ko deialdi publikoa onartzea, baliagarri dagoen aurrekontu esparruan. Deialdia arautzeko, erantsitako dokumentuan ezarritakoa beteko da, bai eta Enplegu, Merkataritza eta Turismo Sustapenaren eta Foru Administrazioaren Saileko Enplegu, Merkataritza eta Turismo Sustapenaren Zuzendaritzaren eskumeneko eremuan ematen diren dirulaguntzak arautzeko oinarri orokorrak ere (Diputatuen Kontseiluaren martxoaren 15eko 26/2016 Foru Dekretua).

2. Foru dekretu honen bidez arautzen diren dirulaguntzak Arabako Foru Aldundiaren 2019ko ekitaldirako luzatutako 2018ko aurrekontuaren 30.5.02.35.01.781.00.01 partidaren kontura ordainduko dira, xedapen erreferentzia honekin: 18.1.18. 105. 1126/000 Hornidurari dagokionez, 100.000,00 eurokoa izango da.

3. Deialdi hau ALHAOn argitaratuko da, eta argitaratu eta hurrengo egunetik aurrera izango du indarra.

Vitoria-Gasteiz, 2019ko otsailaren 25a

Diputatu nagusia

RAMIRO GONZÁLEZ VICENTE

Enplegu, Merkataritza eta Turismo Sustapenaren eta

Foru Administrazioaren Saileko foru diputatua

CRISTINA GONZÁLEZ CALVAR

Enplegu, Merkataritza eta Turismo Sustapenaren zuzendaria

JUAN FELIPE GARCÍA MIRAVALLES

ERANSKINA

PRESTAKUNTZA EKIPAMENDUETAN INBERTITZEKO LAGUNTZAK

2019ko deialdiaren oinarriak

I. KAPITULUA

XEDAPEN OROKORRAK

1. artikulua.– Xedea eta aplikazio eremua

Deialdi honen xedea da Arabako Lanbide Heziketako ikastetxeen eta arautu gabeko prestakuntza ikastaroak eskaintzen dituzten irabazteko xederik gabeko erakundeek ekipamenduaren, zentroen edo ikasgelen gaurkotzea ahalbidetzea.

Deialdi honen bidez diruz lagundu daitezkeen ekipamenduak Arabako lurralde historikoko zentro eta ikasgeletan erabiliko dira.

2. artikulua.– Erakunde onuradunak

2.1. Deialdi honetan, onuraduntzat joko dira ondoren azaltzen diren erakunde motak, baldin eta sozietatearen egoitza Araban alta emanda badute edo gutxienez ere egoitzaren bat edo zerbitzu zentroen bat lurralde horretan badute:

a) Lanbide heziketako zentroak

b) Irabazteko xederik gabeko elkarteak, fundazioak edo beste erakunde batzuk, prestakuntzako entitate gisa egiaztatuta eta/edo inskribatuta daudenak Lanbideren erregistroan edo, hala balegokio, Prestakuntza Entitateen Estatuko Erregistroan.

Dena den, onuradun izateko, ezinbestekoa izango da Arabako Foru Aldundiak sustatutako prestakuntza laguntzen programen barruan diruz lagundutako arautu gabeko prestakuntza ikastaroak eman izana aurreko lau urteetan.

Irabazteko xederik gabeko enpresa edo erakundeek ezingo dituzte jaso laguntza hauek.

2.2. Bi erakunde onuradun mota batengatik baino ezin izango du eskatu laguntza erakunde bakoitzak.

3. artikulua.– Entitate eskatzaileen eskakizunak eta aurkeztu beharreko dokumentazioa

3.1. Entitate eskatzaileek Ogasunarekiko eta Gizarte Segurantzarekiko zerga betebeharrak egunean izan beharko dituzte, 58/2004 Foru Dekretuan ezarritakoaren arabera, bai dirulaguntza emateko ebazpenaren aurretik, bai dirulaguntza ordaindu aurretik.

Horretarako, entitateak Arabako Lurralde Historikoko Ogasunarekiko eta Gizarte Segurantzarekiko betebeharrak betetzen dituela egiaztatzen duen agiri eguneratua aurkeztuko da, edo, bestela, Enplegu, Merkataritza eta Turismo Sustapenaren Zerbitzuak entitate horien aurrean derrigorrezko egiaztapenak egiteko baimena.

Beste foru aldundi edo Arabako Lurralde Historikoaz bestelako lurralde erkide bateko Ogasunaren aurrean zerga betebeharrak bete behar badira, aurreko paragrafoan aipatzen diren zerga betebeharren eskakizunak zergak ordaintzeko betebeharra duen zerga administrazio bakoitzari egiten dio erreferentzia. Eskatzaileak eskakizunak betetzen dituela egiaztatzen duten agiri egokiak aurkeztu beharko ditu.

Titularitate publikoko zentroek ez dute justifikatu behar Ogasun eta Gizarte Segurantzarekiko betebeharrak bete izana.

3.2. Kide bihurtzeko prozesuan edo funtzionamenduan sexu diskriminazioa eragiten duten entitateak ezingo dira izan dirulaguntza hauen onuradun, hala xedatzen baitu Eusko Legebiltzarraren 4/2005 Legearen 24.2 artikulua (otsailaren 18koa, Emakumeen eta Gizonen Berdintasunerako Legea).

Halaber, ezin izango dute deialdi honetan parte hartu sexu bereizkeriagatik zehapen administrazioa edo penala jaso duten pertsona fisiko edo juridikoek, harik eta zehapenean ezarritako epea amaitu arte, eta ezta ere Emakumeen eta gizonen arteko berdintasunerako Legea aplikatuz honelako deialdietan parte hartzeko debekua zehapen gisa ezarri zaienek, hala xedatzen baita 1/1997 Legegintza Dekretuaren 50.5 artikuluan (azaroaren 11koa, Euskadiko Ogasun Nagusiaren antolarauei buruzko Legearen testuategina onartzen duena), Eusko Legebiltzarraren 4/2005 Legearen amaierako seigarren xedapenak emandako idazketaren arabera (4/2005 Legea, otsailaren 18koa, emakumeen eta gizonen arteko berdintasunerakoa).

3.3. Lanbide Heziketako ikastegiak ez diren erakunde eskatzaileek, eskaera aurkezteko garaian, frogatu beharko dute badutela gutxienez egoitza bat edo zerbitzu zentro bat Arabako Lurralde Historikoan eta hartan erakunde eskatzaileak emandako prestakuntza jardunak egin ohi direla edo egin daitezkeela.

3.4. Dirulaguntza hau eskatzen duten entitate guztiek, Lanbide Heziketako ikastegiek salbu, justifikatu beharko dute egiaztatuta eta/edo inskribatuta daudela Lanbideren erregistroan edo, bestela, Prestakuntza Entitateen Estatuko Erregistroan. Egiaztapen eta/edo inskripzio horrek dirulaguntzaren eskabidearen aurretikoa izan beharko du.

3.5. Irabazteko asmorik gabeko elkarte, fundazio edo bestelako erakundeek agiri bidez egiaztatatu beharko dute irabazteko xederik gabeko erakundeak direla. Horretarako, kasuan kasuko administrazio erregistroko inskripzioa aurkeztu beharko dute. Inskripzio horrek dirulaguntzaren eskabidearen aurretikoa izan beharko du.

4. artikulua.– Aurrekontu hornidura

4.1. Deialdiaren hornidura 100.000 eurokoa da; horietatik 90.000 euro lanbide heziketako zentroek aurkeztutako ekipamenduen eskabideetara bideratuko dira, eta 10.000 euro beste prestakuntza entitate batzuek aurkeztutako ekipamenduen eskabideetara bideratuko dira.

4.2. LHko zentroetarako zatia ikastetxe horiek aurkeztutako eskaerekin betetzen ez bada, soberakina erabiliko da gainerako prestakuntza erakundeak aurkeztutako eskabideak diruz laguntzeko.

Era beran, gainerako prestakuntza erakundeentzako zatia ez bada guztiz erabiltzen, LHko ikastetxeei aplikatu ahal izango zaie soberakina.

5. artikulua.– Laguntza jaso dezaketen jarduerak

5.1. Diruz lagundu ahalko dira aktibo inbentariagarriak erostea (makinak, tresnak, lanabesak eta bestelako prestakuntza gaiak), Araban arautu gabeko prestakuntza ikastaroak emateko eta horrekin prestakuntza horren kalitatea hobetzeko badira, eta Araban dauden zentro eta ikasgeletan irakaskuntzarako baliatzeko ez beste ezertarako badira.

5.2. Aurreko atalean aipatutako aktiboak eskuratzen badira, Arabako Lurralde Historikoko dirulaguntzei buruzko urriaren 19ko 11/2016 Foru Arauko 29. artikuluan ezarritakoa bete beharko da.

Hala, bada, arautu gabeko prestakuntza ikastaroak egiteari atxikita egoteko epea ezingo da izan bost urte baino gutxiago erregistro publiko batean inskribatu ahal diren ondasunen kasuan, eta, gainerako ondasunen kasuan, bi urte baino gutxiago.

5.3. 300 eurotik beherako kopurua daukaten ekipamenduetako inbertsio proposamenak ez dira diruz lagunduko.

6. artikulua.– Dirulaguntza jaso ezin duen ekipamendua

Ez dira diruz lagunduko:

- Ikastaroetarako beharrezkoa den material suntsikorra erostea.
- Aplikazio informatikoak edo teknologikoak erabili ahal izateko lizentziak.
- Aldez aurretik diruz lagundutako ekipamendua ordezte, baldin eta oraindik beren iraupen aldiaren barruan badaude.
- Administrazioko elementu komunak: fotokopiagailuak, faxak...
- Prestakuntza ikasgelan ez dauden baina prestakuntzan baino erabiltzen ez diren tresna informatikoak, hala nola, ordenagailuak, inprimagailuak...
- Prestakuntza programa jakin baten zati ez diren zernahi erabilera orokor eta partekatutako gailuak, hala nola, argazki makinak, bideo hitzaldiak, bideo-gailuak...
- Lehenago eskatzailea ez beste jabe batek erabilitakoak.

Enplegu, Merkataritza eta Turismo Sustapenaren Zerbitzuaren ustez, eskabideen artean jasotako ekipamendua edo gastu partidak ez badira nahikoa lagungarriak prestakuntza ekintzak garatzeko, orduan partida horiek baztertu ahalko dira eman beharreko dirulaguntzaren zenbatekoa kalkulatzekoan.

7. artikulua.– Inbertsioa egiteko aldia

Inbertsioa 2019ko urtarrilaren 1aren ostean egin behar da, gehienez ere 2019ko azaroaren 30era arte.

8. artikulua.– Diruz lagundu daitekeen aurrekontua

8.1. Diruz laguntzeko moduko aurrekontua dela joko da eskuratze aurrekontua, baldin eta onartutako ekipamenduetan inbertitzeko proiektuan ageri bada.

8.2. Diruz lagundutako ekipamendua irakaskuntza jardueretarako bakarrik erabil daiteke, zeinak BEZetik salbuetsita baitaude, urtarrilaren 19ko 12/1993 Araugintzako Foru Dekretuak, balio erantsiaren gaineko zergaren foru araua onartzen duenak, 20. Bat.9. artikuluan xedatutakoaren arabera.

Horrenbestez:

– Diruz lagunduko den ekipamendua erostean jasandako BEZa ekipamenduaren aurrekontu diruz lagungarriaren zati izango da.

– BEZaren Foru Arauaren 94. artikuluan ezarritakoarekin bat etorriz, ekipamendu hori eskuratzean jasandako BEZak ez du kenkaria egiteko eskubiderik emango BEZaren aitortzean, aitortze hori eginez gero.

8.3. Diruz laguntzeko moduko ekipamendua eskuratzeko prezioa 15.000,00 euro baino gehiago bada, gutxienez hiru eskaintza eskatu beharko dizkie hiru hornitzailei ondasuna entregatu aurretik, non eta merkatuan ez dagoen behar adina enpresa hornitzaile.

Eskaintza hirukoitz hori eskabidearekin batera aurkeztu beharko da, eta adierazi beharko da zein hautatu den eta zer irizpide erabili diren hautaketarako.

9. artikulua.– Dirulaguntzen zenbatekoak eta mugak

9.1. Emango den laguntzaren zenbatekoa diruz lagundu daitekeen aurrekontuaren ehuneko 80 izango da, honako muga hauekin:

– Ekipamenduaren kostua ken dirulaguntza honetatik kanpo lortutako bestelako diru sarrerak.

– Hurrengo 2. eta 3. idatz zatietan adierazitako mugak.

9.2. Lanbide Heziketako ikastetxeen kasuan, ikastetxe onuradun bakarrak ekipamendu eskabide bategatik edo gehiagogatik gehienez jaso dezakeen dirulaguntzak ezingo ditu gainditu ondoko modulu hauek, aurreko ikasturtean prestakuntza arautuan izandako ikasleen erabateko kopuruaren arabera:

Ikastetxeko ikasle kopurua	Gehieneko dirulaguntza
— 200 ikasle gehienez	5.000 euro
— 201 eta 500 ikasle artean	10.000 euro
— 501 eta 3.000 ikasle artean	25.000 euro
— 3.000 ikasletik gora	45.000 euro

9.3. Lanbide heziketako zentroak ez beste prestakuntza entitate batzuen kasuan, ekipamendu bat edo batzuegatik eman ahalko den gehienezko dirulaguntzak ezingo du gainditu 2.000 euroko kopurua entitate onuradun bakoitzeko.

10. artikulua.– Ekipamendua eskatzea eta eska daitekeen gehieneko ekipamendu kopurua

10.1. Araudi honen ondorioetarako, aurkeztutako hornidura edo ekipamendu mota bakoitza ekipamendu eskabide gisa hartuko dira, hornidura edo ekipamendu horren unitate bat edo gehiago eskatzen diren aintzat hartu gabe.

Eskatzaileak aurreikusi badu muntaketa lanen ondoren instalazio bat osatuko duten zenbait ekipamendu edo hornidura eskuratzea, orduan instalazioa osatuko duten hornidura edo ekipamenduen batura ekipamendu eskabide bakar gisa hartuko da.

Enplegu, Merkataritza eta Turismo Sustapenaren Zerbitzuak egokitzapen lanak egin ahalko ditu, entitate bakoitzak aurkeztutako ekipamendu eskaerak banatuz edo multzokatuz, horrela aurretik ezarritakora hobeto moldatzen dela ulertuz gero.

10.2. Erakunde onuradun bakoitzak gehienez ere eska dezakeen ekipamendu kopurua hau izango da:

– 3.000 ikasle baino gehiago dituzten Lanbide Heziketako zentroetarako: 8 ekipamendu eskaera.

– 501 eta 3.000 ikasle artean dituzten lanbide heziketako zentroak: 5 ekipamendu eskaera.

– 201 eta 500 ikasle artean dituzten lanbide heziketako zentroak: 3 ekipamendu eskaera.

– 200 ikasle edo gutxiago dituzten lanbide heziketako zentroak: 2 ekipamendu eskaera.

– Bestelako prestakuntza erakundeetarako: 2 ekipamendu eskaera.

Entitate eskatzailearen batek ekipamendu eskaera gehiago aurkeztuz gero, baimendutako gehieneko kopuruaz gaindikoak ofizioz baliogabetuko dira, balioetsi gabe, eskatu diren hurrenkera berean.

Era berean, eskatutako dirulaguntzaren zenbateko teorikoa handiagoa bada entitate eskatzaileari 9. artikulua 2. eta 3. idatz zatietan ezarritakoaren arabera eman beharreko dirulaguntzaren gehieneko zenbatekoa baino, ofizioz baliogabetuko dira, balioetsi gabe, aipatutako dirulaguntzaren gehieneko zenbateko baimenduaz gaindikoak, eskatu diren hurrenkera berean.

11. artikulua.– Aurkeztu beharreko agiriak ekipamendu bakoitzerako

Eskaera orokorraz gain, eta eskatutako ekipamendu bakoitzeko, agiri hauek aurkeztu beharko dira:

– Eskatutako ekipamenduaren eskaintza edo aurrekontua, balizko hornitzaileak prestatutakoa; BEZa barne hartu duen edo ez argitu beharko da.

– Horri buruzko informazio zehatza eskainiko duen Interneteko lotura edo deskribapen katalogoa.

– Diruz laguntzeko moduko ondasuna eskuratzeko prezioa 15.000 euro baino gehiago bada, gutxienez hiru eskaintza eskatu beharko dizkie hiru hornitzaileari ondasuna entregatu aurretik, non eta merkatuan ez dagoen behar adina enpresa hornitzaile.

– Eskatutako inbertsioen beharizanen txostena, baita ekipamendua baliatuko duten ikastaroen espezializazioak edo gaiak ere.

12. artikulua.– Hautatzeko eta balioesteko irizpideak

Ekipamendu eskabideak irizpide hauen arabera aztertuko dira:

a) Eskatutako ekipamenduaren eta ekipamendua baliatuko duten ikastaroen gaiaren arteko lotura (0-40 puntu), honela banakatuta:

– Industria arloarekin (ekoizpena, muntaketa, mantentzea, biltegiatzea eta/edo logistika) eta/edo energia eta ingurumen eraginkortasunaren arloarekin zerikusia duten ikastaroetarako ekipamendua: 20 eta 40 puntu bitartean.

– Ekonomia, finantza, kudeaketa, gastronomia edo gizarte zerbitzuen arloekin zerikusia duten ikastaroentzako ekipamendua: 0 eta 30 puntu bitartean.

– Bestelako ikastaroetarako ekipamendua: 0 eta 20 puntu bitartean.

b) Ekipamendua erosteko beharra justifikatzeagatik (0-40 puntu).

Atal honetan entitate eskatzaileak aurkeztutako oinarri eta arrazoiak aztertuko dira.

c) Aurkeztutako eskaeraren kalitatea (0-20 puntu), honela banatuta:

– Eskaera orrien betetze kalitateagatik: 0 eta 5 puntu bitartean.

– Eskaerarekin batera 3. artikuluan jaso den dokumentazioa aurkezteagatik: 0 eta 5 puntu bitartean.

– Eskaerarekin batera 11. artikuluan jaso den dokumentazioa aurkezteagatik: 0 eta 10 puntu bitartean.

II. KAPITULUA

DIRULAGUNTZAK ONARTU, KUDEATU ETA ORDAINTZEKO PROZEDURAK

13. artikulua.– Eskaerak aurkeztea eta inprimaki ereduak

Deialdi honetan deskribatzen diren laguntzak eskatzeko inprimaki ereduak eskuragarri daude Ekonomiako Idazkaritza Teknikoko Zerbitzuan (Probintzia Plaza 5 - 1.a, 01001 Vitoria-Gasteiz), baita Interneteko gunean ere: www.araba.eus.

14. artikulua.– Eskaerak aurkezteko epea eta lekua

14.1. Eskaerak Arabako Foru Aldundiko Enplegu, Merkataritza eta Turismo Sustapenaren Zerbitzuari zuzenduko zaizkio (Arabako Foru Aldundiaren Enplegu, Merkataritza eta Turismo Sustapenaren Zuzendaritza) eta Arabako Foru Aldundiaren erregistro orokorrean edo itundutako udaletako erregistro orokorretan aurkeztuko dira. Hori guztia, ezertan eragotzi gabe urriaren 1eko 39/2015 Legeak, Administrazio prozedura erkidearenak, ezarritakoa.

14.2. Eskaerak aurkezteko 30 egun naturaleko epea egongo da, deialdia Arabako Lurralde Historikoaren Aldizkari Ofizialean argitaratu eta hurrengo egunetik aurrera.

15. artikulua.– Dirulaguntzak emateko prozedura

15.1. Oinarri hauetan aurreikusten diren dirulaguntzak emateko prozedura lehiaketa izango da.

15.2. Dirulaguntza emateko prozedura Enplegu, Merkataritza eta Turismo Sustapenaren eta Foru Administrazioaren Sailak izapidetuko du, Enplegu, Merkataritza eta Turismo Sustapenaren Zerbitzuaren bidez.

15.3. Balorazio batzordean, edo martxoaren 6ko 26/2016 Foru Dekretuak, oinarri orokorrak arautzen dituenak, 6. artikuluan aipatzen duen kide anitzeko organoan, honako hauek izango dira:

- Lehendakaria: Enplegu, Merkataritza eta Turismo Sustapenaren zuzendaria edo berak eskuordetzen duen pertsona.
- Bokala: Enplegu, Merkataritza eta Turismo Sustapenaren Zerbitzuko burua edo berak eskuordetzen duen pertsona.
- Idazkaria: Enplegu, Merkataritza eta Turismo Sustapenaren Zerbitzuko teknikari bat.

15.4. Batzorde horrek baloratuko ditu jasotako eskabideak, 12. artikuluan jasotako hautapen eta balorazio irizpideen konforme.

Talde bakoitzaren barruan, lanbide heziketako zentroak eta prestakuntzako bestelako entitate batzuk, aurkeztutako ekipamenduen lehentasun ordena ezarriko da, lortutako puntuazio altuenetik baxuenera; ordena horretan oinarrituz, eskatutako ekipamendu bakoitzari dagokion dirulaguntzaren esleipena proposatuko da, balorazio altuena lortu dutenekin hasita, erabilgarri dagoen kreditu mugara iritsi arte.

Azken puntuazio-tarteari dagozkion esleipenak –tarte horrek amaitzen du aurrekontu baliagarria– gerakin baliagarria hainbanatuz egingo dira, diruz laguntzeko modukoa den jarduera bakoitzaren aurrekontu diruz laguntzeko modukoaren arabera.

15.5. Balorazio batzordeak ebazpen proposamena aurkeztuko dio organo eskudunari, egoki den ebazpena eman dezan.

15.6. Ebazpenak gutun ziurtatuaren bidez jakinaraziko zaizkio erakunde interesdunari, jaso izanaren agiriarekin. Ebazpen horren aurka, zeinak administrazio bidea amaituko baitu, aurrerako berraztertze errekurtsoa aurkeztu ahal izango zaio ebazpena eman zuen organoari berari edo, bestela, administrazioarekiko auzi errekurtsoa jarri ahal izango da administrazioarekiko auzietarako Gasteizko epaitegietan. Ebazpena jakinarazi eta hurrengo egunetik aurrera kontatuta, lehena aurkezteko hilabete izango da eta bigarrena aurkezteko bi hilabete.

15.7. Oro har, eskabidea bertan behera utzi dela ulertuko da ebazpena eman eta jakinarazteko gehieneko 6 hilabeteko epea igarotzerakoan berariazko ebazpenik eman ez bada, administrazio isiltasunari buruzko foru araudia urtarrilaren 3ko 4/1999 Legea egokitu zuen 1/1999 Foru Dekretu Arauemaileko 2. artikuluko 14. atalean ezarri bezala.

16. artikulua.– Justifikaziorako aurkeztu beharreko dokumentazioa eta emandako dirulaguntzak ordainarazteko eskaera

2019ko abenduaren 5a delarik azken eguna, sarrera eta gastuen balantze ekonomikoarekin batera, azken memoria bat aurkeztu beharko da, diruz lagundutako jarduera gauzatu dela egiaztatzen duena, Enplegu, Merkataritza eta Turismo Sustapenaren Zuzendaritzak gertatutako formatu normalizatuen arabera.

Eskaerarekin batera, honako agiri hauek aurkeztu behar dira:

– Justifikazio kontu erraztua, honako informazio hau jasoko duena:

a) Dirulaguntza ematean ezarritako baldintzak bete direla egiaztatzen duen txostena, burututako ekintzak eta lortutako emaitzak adierazita.

b) Jardueraren gastuen eta diru-sarreraren sailkapen zerrenda. Hartzekodunaren eta dokumentuaren identifikazioa, zenbatekoa, jaulkitze data eta, hala badagokio, ordainketa data adieraziko dira.

c) Diruz lagundutako jarduera finantzatu duten bestelako sarrera eta dirulaguntzen xehetasunak, zenbatekoa eta jatorria adierazita.

– Diruz laguntzeko moduko gastuen fakturak, banaka 300 euro baino gehiago direnak, BEZa barne, eta dagozkien ordainagiriak.

– Erositako ekipamenduaren argazki inprimatuak, jarriko den tokian bertan atereak.

Agiri horiek jaso ondoren ikuskapen bisita egingo da, diruz lagundutako ekipo eta obrak modu egokian ezarri eta egin direla ziurtatzeko.

9 artikuluan ezarritako dirulaguntza mugetako edozein aplikatu bada, onargarria izango da, Enplegu, Merkataritza eta Turismoaren Sustapenaren Zerbitzuak txostena alde aurretik txostena eginik, diruz laguntzeko den gastuan murrizketak egitea, esleitutako dirulaguntza aldatu gabe, ordea; alabaina, beharrezkoa izango da betetzea dirulaguntzaren xedea, eta errespetatzea diruz lagundutako gastuaren gutxieneko zenbateko justifikatu beharrezkoa, alegia, operazio honen emaitza: esleitutako dirulaguntzaren gehieneko zenbatekoa zati aplikatutako dirulaguntza ehunekoak.

Ahal dela, plaka bat ezarriko da Arabako Foru Aldundiak diruz lagundutako ekipamendua dela adieraziz.

17. artikulua.– Ordainketak justifikatzea

17.1. Dirulaguntza aurreko agiriak aurkeztu ondoren ordaindu ahal izango da, justifikatu beharreko aurrerakin gisa, fakturak ordaindu gabe badaude.

17.2. Ondoren erakunde onuradunak 300 euro edo gehiagoko faktura guztiak hornitzaileei ordaindu izanaren frogagiriak aurkeztuko ditu. Horretarako banku laburpenen edo horien baliokide diren egiaztagirien jatorrizkoak edo fotokopia konpultsatuak aurkeztuko dira.

17.3. Agiri horiek aurkezteko epea 2020ko apirilaren 10ean bukatuko da egun hori barne.

17.4. Ez da onartuko eskudirutan ordaintzea 2019rako indarreko araudian ezartzen den zenbatekoa edo hortik gorakoa (edo horren kontrabalioa atzerriko monetetan).

Aurreko paragrafoan aipatzen den zenbatekoa kalkulatzeko, baldin eta ondasun ematea edo zerbitzua zatikatu bada, eragiketa edo ordainketa guztien zenbatekoak batuko dira.

17.5. Baldintza horiek betetzen ez badira, ordaindutako dirulaguntza itzultzea eskatuko da eta, gainera, etorkizuneko laguntza programetan baztertua izatea ekar dezake.

18. artikulua.– Egiaztagiriak aurkezteko lekua eta epea eta dirulaguntza ordaintzeko eskaera

18.1. Egiaztagiriak Enplegu, Merkataritza eta Turismo Sustapenaren Zerbitzuari zuzenduko zaizkio, eta horretarako diseinatutako eredu normalizatuetan aurkeztuko dira.

Egiaztagiriak 14.1 artikuluan aipatzen diren erregistroetan aurkez daitezke. Kasuan kasuko sarrera erregistroko data edo, dokumentazioa postaz bidaltzen bada, postetxeko ziurtagiriaren data hartuko da aurkezpen datatzat.

18.2. Aurreko 16. artikuluan aipatzen diren egiaztagiriak aurkezteko azken eguna 2019ko abenduaren 5a izango da.

18.3. Aurreko 17. artikuluan aipatzen diren ordainketen egiaztagiriak aurkezteko azken eguna 2020ko apirilaren 10a izango da, egun hori barne.

18.4. Egiaztagiriak epez kanpo aurkezten badira, gerta liteke emandako dirulaguntza baliogabetzea.

19. artikulua.– Dirulaguntzak ordaintzea

Behin diruz lagundutako prestakuntza inbertsioa behar bezala egiaztatu ondoren, eta dirulaguntza emateari buruzko ebazpenean zehaztutako betekizun eta baldintzak bete ondoren, likidatu egingo da eman beharreko dirulaguntza.

III. KAPITULUA

BESTE XEDAPEN BATZUK

20. artikulua.– Eskaeran jakinarazitako datuak aldatzea

Diruz lagundutako ekipamenduak edo obrak ezin izango dira ordeztu onartutakoez bestelakoekin, Enplegu, salbu eta Merkataritza eta Turismo Sustapenaren eta Foru Administrazioaren Sailak berariazko baimena ematen badu.

Eskatzaileari onartutako diruz lagun daitekeen gehienezko aurrekontuaren mugarekin, aldatetak egin ahal dira diruz lagundutako ekipamendu mota edo modeloetan, betiere eskabideen ordena aldarazten ez badute, diruz lagundutako kontzepturen bat gauzatu ez bada ere. Desbideratze horiek Enplegu, Merkataritza eta Turismo Sustapenaren Zerbitzuaren oniritzia beharko dute, salbu eta funtsezko aldatetak egiten direnean, halakoei Enplegu, Merkataritza eta Turismo Sustapenaren Zuzendaritzak eman beharko baitie oniritzia.

Eskaeran jasotako datuak aldatzera eraman duten arrazoiak jakinarazten ez badira, dirulaguntza galdu edo murriztu ahal izango da, baldin eta Enplegu, Merkataritza eta Turismoaren Sustapen Zerbitzuaren iritziz aldaketa horrek dirulaguntzak ematerakoan kontuan hartu ziren baldintzak aldatzea ekarri badu.

21. artikulua.– Arautegi aplikagarria

Deialdi hau oinarri hauek arautzen dute, baita Foru Administrazioaren eta Enplegu, Merkataritza eta Turismo Sustapenaren Zuzendaritzaren eskumenen eremuan ematen diren dirulaguntzen oinarri arautzaileek ere (Diputatuen Kontseiluaren martxoaren 15eko 26/2016 Foru Dekretua).

22. artikulua.– Xedapenak interpretatu eta garatzea

Enplegu, Merkataritza eta Turismo Sustapenaren eta Foru Administrazioaren Saileko foru diputuari ahalmena ematen zaio deialdi honen oinarri espezifikoak interpretatzeko, bai eta oinarriok behar bezala aplikatzeko behar diren xedapen guztiak ebazpenen bitartez garatzeko ere.

23. artikulua.– Bateriaezintasunak

Dirulaguntzen eskaera aurkeztu ostean beste laguntzaren bat lortzen bada, horren berri behala eman beharko zaio, idatziz, Enplegu, Merkataritza eta Turismo Sustapenaren Zerbitzuari,

eta hark proposatu ahal izango du emandako dirulaguntzaren zenbatekoa edo baldintzak aldatzea.

Deialdi honen bidez lortutako laguntzari besterik gehituko balitzaio, edozein dela ere haren izaera (publikoa edo pribatua) edo hura ematen duen organoa, haien batura ezin izango litzateke izan diruz lagundutako jardueraren edo proiektuaren kostua baino gehiago.